

AUGLÝSING

um breytingu á deiliskipulagi við Brekkubæjarskóla og nýtt deiliskipulag við Grundaskóla, Akranesi.

Á fundi bæjarstjórnar Akraness þann 28. september 1999 var samþykkt tillaga að breytingu á deiliskipulagi við Brekkubæjarskóla og nýtt deiliskipulag við Grundaskóla, Akranesi.

Um er að ræða breytingu á deiliskipulagi Brekkubæjarskóla þar sem afmarkaður er sameiginlegur byggingareitur skólans og íþróttahússins við Vesturgötu og nýtt deiliskipulag við Grundaskóla.

Auglýst hefur verið eftir athugasemdum skv. 25. gr. skipulags- og byggingarlaga nr. 73/1997 frá og með 24. júní 1999 til og með 20. ágúst 1999. Engar athugasemdir bárust. Framangreint skipulag skólalóða tekur þegar gildi.

Akranesi, 11. október 1999.

Skúli Lýðsson bygginga- og skipulagsfulltrúi.

Nr. 690

6. október 1999

AUGLÝSING

um staðfestingu á breytingu á aðalskipulagi Reykjavíkur 1996-2016, göngubrú yfir Miklubraut.

Samkvæmt skipulags- og byggingarlögum nr. 73/1997, sbr. 2. mgr. 21. gr., hefur ráðherra þann 6. október 1999 staðfest breytingu á aðalskipulagi Reykjavíkur 1996-2016 frá 18. ágúst 1997.

Göngubrú yfir Miklubraut á móts við Grundargerði færir um 120 m til vesturs.

Uppdrátturinn hefur hlotið þá meðferð sem skipulags- og byggingarlög mæla fyrir um og samþykki borgarráðs Reykjavíkur. Skipulagsstofnun hefur afgreitt erindið til staðfestingar.

Umhverfisráðuneytinu, 6. október 1999.

Siv Friðleifsdóttir.

Hrafn Hallgrímsson.

Nr. 691

6. október 1999

AUGLÝSING

um staðfestingu á breytingu á aðalskipulagi Kirkjubæjarklausturs 1988-2008, Skaftárhreppi, við Hæðargarðsvatn.

Samkvæmt skipulags- og byggingarlögum nr. 73/1997, sbr. 1. mgr. 21. gr., hefur ráðherra þann 6. október 1999 staðfest breytingu á aðalskipulagi Kirkjubæjarklausturs 1988-2008, Skaftárhreppi frá 21. maí 1990.

Breytingar varða landnotkun við Hæðargarðsvatn: Opnu óbyggðu svæði er breytt í frístundabyggð með tilheyrandi akstursaðkomu, opnu óbyggðu svæði er breytt í landbúnaðarsvæði og opið óbyggt svæði verður opið svæði til sérstakra nota.

Uppdrátturinn hefur hlotið þá meðferð sem skipulags- og byggingarlög mæla fyrir um og samþykki hreppsnefndar Skaftárhrepps. Skipulagsstofnun hefur afgreitt erindið til staðfestingar.

Umhverfisstofnun, 6. október 1999.

Siv Friðleifsdóttir.

Hrafn Hallgrímsson.

4. október 1999

Nr. 692

REGLUGERÐ

um flugskóla.

1. gr.

Flugskóli telst skóli, sem fengið hefur heimild Flugmálastjórnar Íslands til að starfa samkvæmt ákvæðum reglugerðar þessarar og reglum Flugöryggissamtaka Evrópu, JAR-FCL, og gefur nemendum sínum kost á almennu verklegu og/eða bóklegu flugnámi til þeirra réttinda sem tiltekin eru í starfsleyfi. Flugskóli getur einnig, að uppfylltum þeim skilyrðum sem sett eru, fengið leyfi Flugmálastjórnar til að annast flugkennslu til aukinna réttinda flugmanna.

2. gr.

Flugkennsla skal eingöngu fara fram við flugskóla sem viðurkenndir hafa verið af Flugmálastjórn. Viðurkenning er tvenns konar. Gerður er greinarmunur á samþykktum flugskólum og skráðum flugskólum. Í skráðum flugskólum getur m.a. farið fram verkleg og bókleg kennsla fyrir einkaflugmannsskírteini, næturflugsáritun og flokksáritun á einshreyfils einstjórnarloftför.

Í samþykktum flugskólum getur auk þess m.a. farið fram bókleg og verkleg kennsla fyrir atvinnuflugmannsskírteini og blindflugsréttindi, flugkennaraáritanir og tilheyrandi aukin réttindi ásamt bóklegri kennslu fyrir atvinnuflugmannsskírteini 1. flokks. Í samþykktum tegundaráritunarskólum getur farið fram kennsla fyrir tegundaráritanir og áhafnar-samstarf.

3. gr.

Sækja skal um leyfi til reksturs flugskóla til Flugmálastjórnar. Umsókn skal greina nákvæmar upplýsingar um eftirgreind atriði:

- nafn umsækjanda, heimilisfang, kennitölu og símanúmer.
- þjóðerni umsækjanda, viðskiptabanka hans og/eða fjármögnunaraðila. Ef um félag er að ræða skal tilgreina félagsform og skiptingu eignaraðildar. Ef eignaraðild er erlend skal sérstök grein gerð fyrir því. Hlutfé skal greina sé um slíkt félag að ræða og hver hluti þess sé innborgaður svo og nöfn stjórnarmanna. Einnig skal koma fram hvort umsækjandi hefur annan atvinnurekstur með höndum og þá hvaða.
- skipulag og stjórn fyrirhugaðrar flugkennslustarfsemi. Gera skal grein fyrir hæfni tilnefnds skólastjóra, yfirflugkennara, yfirkennara bóklegrar kennslu, flugrekstrarstjóra og tæknistjóra til að taka þessi störf að sér.
- greina skal þau loftför sem nota á við kennsluna og færa skal sönnur á umráðarétt yfir þeim ef umsækjandi er ekki skráður eigandi þeirra. Gera skal grein fyrir starfstöð skólans og viðhaldsstöð.